

# ধর্ষন, পাকিস্তানি ষ্টাইল

## আশীষ বাবলু

It is no use saying 'We are doing our best'.  
You have got to be succeed in doing  
what is necessary. (Winston Churchill)

খ্রিষ্টপূর্ব ৫০৯ সাল। রোমান রাজা তারকুইনের এক ছেলে ছিল, নাম সেক্সটাস। গ্রামের সবচাইতে মিষ্টি মেয়েটি যে তার সোনালী চুলে ফুল লাগিয়ে প্রজাপতির পেছনে ছুটে বেড়াতো তার নাম ছিল লুক্রেশিয়া। একদিন রাজার ছেলে সেক্সটাস লুক্রেশিয়াকে একা পেয়ে নির্মম ভাবে ধর্ষন করল। নরম লুক্রেশিয়া সেই আঘাত সহিতে না পেরে আত্মহত্যা করে। রোমের সাধারণ মানুষ রাগে মেয়েটির মৃতদেহ নিয়ে হাজির হলো রাজ দরবারে। চাইল বিচার। রাজা নানা রকম টালবাহনা শুরু করলেন। সেই নিশংস ধর্ষনের বিরুদ্ধে মানুষ এমন ভাবে ক্ষেপে উঠল যে বদলে গেল ইউরোপের ইতিহাস। রাজা তাইকুনকে দেশ থেকে তাড়িয়ে দিল রোমের জনগন। এবং শুরু হলো পৃথিবীতে প্রথম গনতন্ত্রের যাত্রা। প্রতিষ্ঠিত হলো রোমান প্রজাতন্ত্র।

এটা ছিল রোমান রাজপুত্রের ধর্ষনের গল্প। এবার শুনুন পাকিস্তানি রাজপুত্রদের ধর্ষনের কাহিনী।

১৯৭১ সাল। পূর্ব পাকিস্তানের ছবির মত একটি গ্রাম। সেখানে প্রজাপতি আর ফরিং এর পেছনে ঘুড়ে বেড়াতো খোঁপায় তারার ফুল গুঁজে দশ বছরের একটি মেয়ে। নাম সম্ভবত ফুলেশ্বরী। অন্যদিনের মতই একটি দিন। গ্রামের মানুষ যে যার কাজে ব্যাস্ত। হঠাৎকরে কোথাথেকে একদল পশ্চিম পাকিস্তানি সৈন্য গোলা-গুলি ছুড়তে ছুড়তে সে গ্রামে এসে হাজির। ওদের সাথে এক ডজন রাজাকার। পাটের গুদাম, পোস্ট অপিস, ডাক্তারখানা, লাইব্রেরী এবং স্কুলে ওরা আগুন লাগালো। গ্রামের প্রত্যেকটি ঘর থেকে সমস্ত মানুষদের জড়ো করলো সূর্যদীঘির মাঠে। পুরুষদের একদিকে এবং মেয়েদের অন্যদিকে দাড়াতে বলল। মোটা গৌফওয়াল ক্যাপটিন জাতীয় রাজপুত্রটি গৌফে তাঁ দিতে দিতে হঠাৎ করে একটা আঙুল বাংলার আকাশের দিকে তুলে ধরলো। সাথে সাথে ঠা ঠা করে চলল গুলি পুরুষদের তাক করে। ঢলে পড়লো মৃত্যুর কোলে গ্রামের প্রত্যেকটি পুরুষ। সবুজ ঘাস লাল হলো অনেকটা আমাদের পতাকার মত। এবার দশ থেকে চল্লিশ বছরের মেয়েদের তুলে নিল লঞ্চ। সে দলে মাতৃহীনা ফুলেশ্বরীও ছিল। লঞ্চ যখন ছাড়বে তখন কৃমি রোগীর মত দেখতে একজন রাজাকার এক পাকিস্তানি সৈন্যকে জিজ্ঞেস করলো, স্যার, এই বুড্ডা মহিলা গুলো রয়ে গেলো, এদের গুলি

করবেন না ? পাকিস্তানি সৈন্যটি বলল,- না, কান্না করার জন্য কিছু মানুষের বেঁচে থাকা দরকার ।

ভেঁ ভেঁ শব্দ করে লঞ্চ ছাড়লো । টারবাইনের আঘাতে খান্ খান্ হয়ে ভেঙ্গে পড়ল নদী । সেই মোটা গৌফওয়ালা ক্যাপটিনটির আর ত্বর সইলনা । ডেকে আনলো দশ বছরের ফুলেশ্বরীকে তার ক্যাবিনে । ছিড়ে খুবলে খেলো না-ফেঁটা কলির মত নিস্পাপ মেয়েটিকে । ফুলেশ্বরীর চিৎকার মিশে গেল নদীর পাড়ে ওর নানীর বুক চাপড়ানো কান্নার সাথে ।

এই ঘটনাটি আমার বানানো গল্প নয় । এটা বলেছিলেন ডঃ জেফ্রি ডেভিস । পাকিস্তানি সৈন্যদের বর্বরতার একজন নীরব স্বাক্ষী । সবচাইতে বড় কথা আজ আমরা যে দেশের মাটিতে ঘর বেঁধেছি, এই অস্ট্রেলিয়ার মানুষই ডঃ জেফ্রি ডেভিস । তিনি ১৯৭২ সালে ছয় মাস বাংলাদেশে ছিলেন ধর্ষিতা মা বোনদের গর্ভপাত করানোর কাজে । তিনি প্রথম কাজ শুরু করেন ধানমন্ডির একটি ক্লিনিকে । এতবেশি গর্ভবতী মহিলা ছিল যে প্রতিদিন ১০০টি গর্ভপাত ঘটিয়েও কুলিয়ে উঠতে পাড়ছিলেন না । আরো কিছু লোককে ট্রেনিং দিয়ে তিনি ঢাকার বাইডেও ক্লিনিক খুললেন । যাদের পয়সা ছিল তারা লোকচক্ষুর আরালে গর্ভপাত করতে চলে যেতো কলকাতায় ।



ডঃ ডেভিস বলছিলেন, ক্লিনিকে যে সব মেয়েরা আসতো প্রায় সবাই নিজের ইচ্ছায়ই আসতো । সেখানে সব বয়সের, সব ধর্মের মেয়েরাই আসতো । সব চাইতে আশ্চর্যের ব্যাপার হলো ওরা কেও কাঁদতো না বা ভেঙ্গে পড়তো না । এদের উপর গত মাসগুলিতে এমন বিভৎস অত্যাচার হয়েছে যে কাঁদতে কাঁদতে চোখের জল শুকিয়ে গেছে । ওরা আত্মাকে অবিক্রিত রেখে দেহ দান করে গেছে ।

প্রত্যেকটি আর্মি ক্যাম্পে এদের রাখা হতো । দেখতে ভাল এমন মেয়েদের রাখা হতো অফিসারদের জন্য আর বাকিরা সাধারণ সৈন্যদের ব্যবহার সামগ্রী । প্রতিদিন কয়েকবার, কয়েকজন মিলে এদের ধর্ষন করতো । এদের খুবই সামান্য খাবার দাবার দেওয়া হতো । প্রতিদিন ২০/২৫ জন মৃত্যুর কোলে চলে পরতো । ডঃ জেফ্রি ডেভিস যখন এই কথাগুলো ডঃ রিনা ডি কোস্টাকে বলছিলেন তখন তার চোখ বেয়ে টপ্ টপ্ করে ঝড়ে পড়ছিল জল । ঢাকা কেন্দনমেন্টেই ছিল এমন চার হাজার মা বোন ।

ডঃ রিনা ডি কোস্টার পরিচয় না জানিয়ে এই লেখা আর এগিয়ে নেওয়া ঠিক হবেনা। তিনি ডক্টরেট করেছেন ইন্টারন্যাশনাল রিলেসন্স এ অস্ট্রেলিয়ার ন্যাশনাল ইউনিভার্সিটি থেকে (ANU)। তিনি মাস্টার ডিগ্রি নিয়েছেন ইউনিভার্সিটি অফ নটরড্যাম, ইউ,এস,এ থেকে। সবচাইতে বড় কথা তিনি ঢাকা বিশ্ববিদ্যালয়ের ছাত্রি ছিলেন। ডঃ জেফ্রি ডেভিসের এই সাক্ষাতকারটি নিয়ে তিনি আমাদের একটা ঐতিহাসিক সত্যের সন্ধান দিয়েছেন। এটা দুঃখজনক হলেও সত্য দশ লক্ষ ধর্ষিতা মা বোনের চোখের জল লেগে আছে আমাদের স্বাধীনতার ইতিহাসে। কিন্তু এদের সম্বন্ধে খুব কম বলা হয়েছে। না সাহিত্যে, না সংবাদে। ধর্ষন, গর্ভপাত, জারজ, ইজ্জতহানী, এইসব শব্দগুলো আমাদের তথাকথিত ভদ্র সমাজে খোলাখুলি বলা যায়না। ফিস ফিস করে বলতে হয়। যাদের ইজ্জতই চলে গেছে, তাদের আর ইজ্জত দিয়ে কি লাভ!

ডঃ ডেভিড বলছিলেন ডঃ কোস্টাকে, গর্ভপাত করাতে করাতে আমার ইচ্ছা হতো পৃথিবীর আদালতে চিৎকার করে এই সব মানুষগুলোর জন্য বিচার চাই। আমার মতো সামান্য একজন ডাক্তারের কতটুকুইবা ক্ষমতা আছে!

গর্ভপাত ঘটানোই শেষ কথা নয়। এসব মেয়েরা যখন স্বামীর কাছে ফিরে যেতো তখন সহ্য করতে হতো অমানুষিক অত্যাচার। আমাদের সমাজ ব্যবস্থায় তাদের আর স্বাভাবিক জীবন যাপনের সুযোগ দিতোনা। অনেকেই আত্মহত্যা করতো, নয়তো পরিবারের লোকজন তাদের হত্যা করতো। পদ্মা, শীতলক্ষ্যা, ব্রহ্মপুত্রের জলে অনেক হতভাগিনীর লাশ স্বাধীনতার পর মাসের পর মাস ভেসে যেতে দেখা গেছে। তিনি বলছিলেন, শুধু গর্ভপাত নয়, যাদের সন্তান হয়েগিয়েছিল সেই সব সন্তানদের রক্ষা করাও ছিল এক বিশাল দায়িত্ব। এ ব্যাপারে এগিয়ে এসেছিল ইন্টার ন্যাশনাল সোশাল সারভিস এবং মাদার টেরেসার সংগঠন। এরা হাজার হাজার শিশুকে দত্তক নেবার ব্যবস্থা করে দিয়েছে আমেরিকা এবং ইউরোপে।

সেই সব দত্তক শিশুরা আজ ৪২ বছরের যুবক। আমার খুবই জানতে ইচ্ছা করে তারা কে কেমন আছেন? কি ভাষায় কথা বলেন? তাদের দুখিনী মায়ের খবর কি তারা জানেন?

ডঃ ডেভিস বেশ কিছু যুদ্ধ বন্দী পাকিস্তানি সৈনিকের সাথে কথা বলেছেন। তিনি আশ্চর্য



Raped and made pregnant by a Pakistani soldier, this teenage girl will leave her new-born baby for adoption at Mother Teresa's Home.

হয়েছেন জেনে যে, ঐসব সৈন্যরা মনে করতেন যে ধর্ষন করে তারা কোন অপরাধই করেনি । সবচাইতে ভয়ঙ্কর যে তারা নারী ধর্ষনকে জায়েজ মনে করতেন । আর্মি অফিসারদের সাধারণ সৈন্যদের উপর করা নির্দেশ ছিল যেহেতু একজন ঈমানদার মুসলিম তার পিতার বিরুদ্ধে লড়বেনা, সেহেতু যত বেশি সম্ভব বাংলাদেশী নারীদের গর্ভবতী করো । এ থেকে একটা গোটা প্রজন্ম জন্মাবে যাদের শরীরে বইবে পশ্চিম পাকিস্তানি সাচ্চা মুসলিম রক্ত ।

আমাদের স্বাধীনতা যুদ্ধ যদি আরো কয়েক বছর দীর্ঘায়িত হতো তবে কি ভয়াবহ ঘটনা ঘটতো ভাবলে হাত পা ঠাণ্ডা হয়ে যায় । শ্রদ্ধেয় কথাশিল্পী সওকত ওসমানের লেখা থেকে একটু উদ্ধৃতি এখানে



দেওয়া যায় । তিনি লিখেছেন,- "... সে হানাদার পাতিস্তানি সৈনিক সুতরাং পূর্ব পাকিস্তানের সব রমণীর সঙ্গে শয়নের অধিকার তার কাছে পদবলৎ । এবং এই সুবাদের বদৌলতে সে আমার কত রকমের আত্মিয়না হতে পারে । সে আমার বোনাই, মেসো, খালু, ফুপা, পিসে, বাপজান, চাচাজান, - এমন সম্পর্কের যত রকমের বিন্যাস কল্পনা করা যায়, সবই সম্ভব । তিনি আরো লিখেছেন, ১৯৭৭ সালে পাকিস্তানের তদানিন্তিন মহাপ্রভু জুলফিকার আলী ভুট্টো বাংলাদেশের দুঃস্থ জনগনের দুঃখ লাঘবের জন্য কয়েক টন চাল আর কয়েক বেল কাপড় পাঠিয়েছিলেন । সেই মালবাহী জাহাজ চট্টগ্রাম বন্দরে পৌছানোর পর বাংলাদেশের কিছু নাগরিক পাকিস্তান জিন্দাবাদ ধ্বনি যোগে এবং আতশ বাজী ফুটিয়ে তাদের অভ্যর্থনা জানায় । বুঝায়, তিরিশ লক্ষ শহীদ এবং নাৎসীদের অত্যাচার স্মানকারী পাকিস্তানি হানাদার সৈন্যদের নির্যাতন, গনহত্যা, অগ্নিদাহ, নারী-ধর্ষনের স্মৃতি কিছু তাদের মনে ছিলনা । যদিও ব্যবধান মাত্র পাঁচ বছর । তখনই মনে হয়েছিল বাংলাদেশের কারো মা-বোনকে বেইজ্জত বে-আব্রু করার জন্য লাগে এক আধ কিলো চাউল এবং এক আধ গজ কাপড় ।..."

যাক্ আবার ডঃ ডেভিস্ এর প্রসঙ্গে ফিরে আসি । এই সাক্ষাৎকারটি নেয়া হয়েছিল ২০০২ সালে । ডঃ ডি কোস্টা লিখেছেন, - "শেষ পর্বে ডঃ ডেভিস কে বললাম এই সাক্ষাৎকারের

অনেক কথাই যদি কোন দিন ওয়ার ক্রাইম ট্রাইবুনালে অপরাধীদের বিচার হয় তবে কাজে লাগবে। তিনি আমার একটি হাত তার বুকের কাছে রাখলো এবং বললেন আমার সমস্ত কিছু বাংলাদেশের ঐ ধর্ষিতা মেয়েদের বিচারের জন্য সমর্পন করতে আমি প্রস্তুত।”

সাক্ষাৎকারের শেষ প্রশ্ন ছিল, এইযে বলাহয় আমাদের স্বাধীনতা যুদ্ধে দশ লক্ষ মা বোনকে ইজ্জত দিতে হয়েছে সংখ্যাটা কি ঠিক? ডঃ ডেভিস্ অনেকটা সময় চুপ করে মাথা নামিয়ে ছিলেন, তারপর বললেন, সংখ্যাটা আরো বেশী হতে পারে, কম নয়।

ডঃ জেফরি ডেভিস্ ২০০৮ সালে এই সিডনি শহরেই শেষ নিঃশ্বাস ত্যাগ করেন।

[ashisbablu13@yahoo.com.au](mailto:ashisbablu13@yahoo.com.au)